

62. “ Butyrum sacrum, a te, sacrifice, rite in ignem conjectum, pluvia  
“ fit, irrigans fruges ariditate exsiccatas.

63. “ Quod cives mei ævi humani spatium transigunt, nullo metu, nul-  
“ laque calamitate vexati, hujus rei caussa est sanctitas tua divina.

64. “ Ita cum tu, magister meus a BRAHMANE oriundus, memor sis mei,  
“ nullis infortuniis afflicti, quomodo fieri possit, ut felicitates meæ non  
“ continua serie sese excipiant ?

65. “ Attamen haud diligit me terra cum insulis, quamvis gemmas pro-  
“ creans, quoniam ex hac tua filia nondum prolem accepi, ipsi similem.

66. “ Stirpis meæ majores, post me libi cessationem prævidentes, continuo  
“ cibo fruendi cupidi, non ad satietatem edunt de libatione.

67. “ Avorum meorum manes, aquam a me libatam, me mortuo ægre com-  
“ parandam fore putantes, bibunt suspiriis tepefactam.

68. “ Ille ego, animo sacrificiis lustrato, sed prole privatus oculos clau-  
“ dens, fulgens sum atque non fulgens, *Lokálokæ* montis instar.

69. “ In altero mundo voluptatem præbet meritum e castigationibus  
“ atque munificentia ortum : progenies vero, e pura stirpe nata, hic atque  
“ illic felicitatem suppeditat.

70. “ Hac orbatum videns me, vitæ meæ moderator, quomodo non mœrore  
“ affligeris, ac si sterilem videres eremi arborem a te ipso amanter rigatam ?

71. “ Hocce debitorum meorum ultimum, scito, venerande, intolerabili  
“ dolore me excruciat, veluti funis durus elephantum a lavando prohibitum.

72. “ Hoc debito ut exsolvar, ita tu curare debes : nam in re difficili felix  
“ IKSHVÁKUIDARUM successus ex te pendet.”

73. Ita jussus a rege sapiens, oculis meditatione immotis, per temporis  
momentum stetit lacus instar in quo pisces dormiunt.

74. Ille, puro animo, per meditationem profundam vidit caussam, quæ  
regis progeniem retardaret, atque tum sic eum allocutus est :

75. “ Olim, cum INDRAM invisisses atque in terram redires, SURABHIS  
“ in via tua in umbram arboris cœlestis confugerat.